



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 16. 2018

Riesgo di Invershon i e Importansha di Diversifikashon

Parti 2

Esaki ta e kontinuashon di e serie di dos parti di Riesgo di Invershon i e Importansha di Diversifikashon. Parti 1, kaminda a diskutí tokante riesgo di invershon, ta optenibel na www.investorscorner.info òf na www.dcsx.cw.

“E bunitesa di diversifikashon ta ku e ta yega mas serka posibel ku bo por yega na un ganga grátis tokante invershon.”

Barry Ritholtz

Den e artíkulo anterior nos a eksplorá riesgo i nos a ripará ku e definishon ta simplemente e chèns ku algu malu por sosodé. Si nos apliká esaki na invershon, riesgo ta e posibilidat ku bo lo no gana loke bo a ferwagt riba e plaka ku bo a invertí originalmente òf pió, bo por pèrdè algu di bo sèn òf tur bo sèn.

E riesgo aki di pèrdida, ta eksistí pa kada un tipo di invershon. No ta eksistí apsolutamente niun invershon den universo ku ta sin riesgo! ABSOLUTAMENTE NIUN! Ken ku bisa bo otro sea ta gaña òf no sa di kiko e ta papia. Hala kita! En bèrdad, pa sierto invershon, manera den akshon, generalmente e riesgo di pèrdè bo sèn ta asta mas grandi ku otro invershon manera por ehèmpel bono. Ta p’esei lo bo tende invershonista profeshonal bisa ku akshon tin mas riesgo ku bono òf un konsehero lo rekomendá bono mas lihé na un invershonista ku no gusta tuma riesgo òf un hende ku a kaba di kuminsá di invertí.

P’esei e invershonista sabí lo trata di manehá e riesgo di pèrdida aki di tal manera ku e posibilidat di pèrdida ta redusí miéntras ku e chèns di haña un ganashi haltu ta oumentá. Aki diversifikashon ta drenta!

Ke men, kiko eksaktamente ta diversifikashon? Diversifikashon ke men no pone tur kos den un makutu pasobra si algu pasa esun makutu ei bo por pèrdè tur kos. Bo no ke pa esei pasa! P'esei ta solamente prudente, pa bo tin por ehèmpel dos òf tres òf kuater makutu diferente dependiente di kuantu bo por permití bo mes! Na mes manera, den invershon, diversifikashon ta kaminda un invershonista ta kumpra un variedat di invershon, por ehèmpel, bono, akshon, propiedat inmóbil, materia prima manera oro, pintura ets., ku e plaka disponibel pa invershon. Ke men, si e preis di akshon kai, ainda bo por gana plaka ku bono, oro, edifisio òf pintura ku kisas bo tin den bo kartera. Diversifikashon ta basta simpel i e ta un un téknika ku ta usa hopi den invershon pa manehá riesgo.

“Fondo mutuo histórikamente a ofresé seguridat i diversifikashon. I nan ta skapá bo di e responsabilidat di buska akshon individual.”

Ron Chernow

Awor mi sa kiko bo ta bisa, mi no tin e plaka pa kumpra tantu diferente tipo di invershon pa haña e diversifikashon ku kisas mi tin mester di dje. No prekupá, tin un solushon pa esaki. E yama un Fondo Mutuo. Fondonan Mutuo ta un tipo spesial di invershonnan ku ta perfekto pa invershonista chikí. Ta un solushon di invershon profeshonalmente manehá ku ta pone plaka huntu di hopi invershonista pa kumpra diferente tipo di seguridat, inkluyendo materia prima manera oro, bono, seguridat, pintura ets. Un fondo mutuo ta un solushon di invershon diversifiká pre-paketá pa tur tipo di invershonista ku ke yega un kaminda kumpra diversifikashon di riesgo den un tiru.

Tin diferente tipo di fondo mutuo ku ta ofresé un òf otro nivel di diversifikashon - tin Fondo Mutuo ku ta kumpra diferente tipo di akshon, otro fondo mutuo ku ta kumpra diferente tipo di bono i otro ku ta kumpra kombinashon di tantu akshon komo bono. Tin fondo ku ta invertí den papel di balor ku ta duna bo rendementu riba mayoria di e akshonnan kumbre riba un bolsa. Pasobra Fondo Mutuo ta varia den términonan di loke nan lo kumpra, ta importante pa balotá e tipo papel di balor ku e Fondo Mutuo lo invertí aden promé ku bo kumpra den e Fondo Mutuo. Un fondo mutuo ta un ehèmpel perfekto di e funshonamentu di diversifikashon di riesgo di invershon!

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki a wòrdu presentá na bo pa DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.



